

武夷新集

卷

伍

武夫新集

卷

四

楊大年先生武夷新集卷之十三

邢關李 繡文素甫

鍾秀李葆貞守一甫全較

晉江楊于先錫圭甫

表狀二

賀劒門破賊表

臣某言今月二十七日得本道進奏院狀報近有西
川駐泊神衛右第三軍第二都虞候王均等爲惡作

亂奔衝劍門已據劍門都監裴臻與知州李士衡同
共殺敗者蠱毒甚微敢行稱亂鴟張未幾已覩成擒
兇醜旣殲朝野相慶臣某

中謝

竊以王者之謹關梁

所以備他盜用鈇鉞所以誅叛臣如王均等身率戎
行地親藩衛祿廩優厚賜予便蕃饗飫膏梁被服輕
煖出荷干城之寄曾無汗馬之勞乃敢結構異端恊
從羣小苟圖不軌輒負大恩挺狼貪羊狠之謀爲鼠
竊狗偷之計天設之險爰肆憑凌鬼得而誅豈容越

軼裴臻等任當要害職在誰何屬蛇豕之興妖乘貔
貅之鼓怒遂摧鋒而奮擊未旋踵以剪除元惡旣就
於梟懸餘黨更無於焦類寢皮食肉式快忠義之心
犯門斬關永破姦邪之膽天威所被并絡載寧賞典
聿行輿誦斯愜臣忝分憂寄幸覩捷音慶抃之誠實
萬常品無任

云云

謝賜詔書欽恤刑獄表

臣某言今月十日本州進奏院遞到勅書一道賜臣

欽恤刑獄者臣當時集軍州官吏宣示仍下管內諸
縣施行訖天網雖疎尙多於嬰拂夏日可畏用示於
哀矜尺一之詔俯臨圜土之人何幸臣某

中謝

竊以

世質民淳唐虞以之畫象政平訟息文景幾於措刑
蓋由五聽無冤三章不濫上懷欽恤之旨下萌耻格
之心用臻太和式符至治伏以崇文廣武聖明仁孝
皇帝陛下憂勞庶政涵育羣生化遠被於不毛仁必
沾於行葦隱悼伏念表視民之如傷震曜誅夷示臨

下之有赫政經載肅治具畢張矧於流爍之辰獨軫
係纍之苦皇華遣使在犴獄之已清紫素裁書復德
音之荐降慮及米鹽之細恩同雨露之濡疾疢者旣
示醫治貧困者仍加廩給昔周聚毒藥止療於邦畿
漢設淖糜不沾於囹圄足以彰皇猷之冠古實以固
率土之宅心佇去殺以勝殘永無爲而無事臣忝分
符竹肅奉絲綸徵慎罰之前言體泣辜之深旨金科
玉律期適於重輕叢棘黃沙敢令於繫滯誓傾勤瘁

仰奉欽明臣無任歡呼激切之至

進承天節頌表

臣某言運偶承平節臨載誕凡叨食於周粟盡願祝

於堯年臣某

中謝

臣本自諸生偶干寸祿受兩朝之

顧盼無馮唐不遇之嗟閱四部之圖書有黃香未見
之耻雖研精而強力終昧道以迷津然而千載休辰
萬邦大慶充庭任土慙非玉帛之云巢閣舞庭豈在
飛走之末是敢罄竭庸鄙撰承天節頌一首獻於闕

下吉甫作頌愧無清風之稱東方上書或希乙夜之
臣無任

代人乞太師御書表

臣某言臣世受國恩名叅閨籍竊仰先朝之述作欲
期私室以祕藏輒露愚衷上干聖聽臣某

中謝

臣伏

見太宗皇帝御製御書等思窮造化妙絕古今與六
籍以攸同非二王之能及固已勒於琬琰揭在蓬萊
名山大川深藏於副本石室金匱首冠於羣書皆所

以博綜儒玄跌宕文史立言不朽乃孔氏春秋之徒
懸法授人實唐堯歷象之比汾水之宸遊雖遠羽陵
之墜簡多存如臣忝荷箕裘幸塵簪紱犬馬之志敢
忘於糜捐龜龍之文徒思於鑽仰輒削章而有請實
昧死以無疑伏望尊號皇帝陛下念先臣際會之由
察賤子勤拳之懇特詔金滕之府許求玉字之書賚
及下臣光生寒族威神如在固共畏於軒臺教化所
資誓永藏於魯壁祈恩之至伏切愚衷

代中書乞罷免表二首

臣某等言臣等竊以陰陽燮治之任實繫台司水旱
策免之文具存載籍苟弼諧之無狀而災沴之或生
姑務儉安靡思避位豈但妨於賢路深有負於國恩
臣某等

中謝

恭以宰相之位實代天工四海之所具
瞻一人之所注意必在彌綸百度綜覈羣材親附萬
民折衝千里外清戎略使金革之不興上奉天時俾
風雨之咸若然後彝倫攸叙比屋可封富庶而日用

不知端拱而天下自治此輔相之職也自非懷經邦
之略負命世之才補公袞以有餘據台槐而無媿若
逢時而肆竊但積日以晏安豈惟累三光之明固亦
致四夷之哂臣等內訟已久自知甚明苟不露於肺
肝亦何覩於面目如臣沆者本非奇特蓋出遭逢先
朝擢自禁林俾叅機務曾乏訐謨之効備彰尸素之
愆皇帝陛下以青宮之舊僚委黃扉之庶政深辜物
望莫舉官常臣化基僅及中人曾無遠慮先聖偶加

於委用明君未忍於棄捐尙待罪以如初實冒榮之
茲甚臣敏中早親片善出自諸生固無經濟之能久
玷樞機之任周旋兩府終始九年因循徒換於炎涼
禪益莫施於塵露內省三臣之蒙鄙曷當萬乘之倚
毗徒夙夜以自強終材力之有限履新居上旣所置
之非宜綆短汲深故雖勤而無効以至和氣不應庶
績未凝林胡犯邊勞翠華而巡狩庸蜀作梗煩羽檄
以徵兵胡雛輒肆於陸梁靈武尙艱於飛輓江吳之

俗饑饉荐臻老幼流離戶口減耗去年近輔淫雨爲
災今歲中春甘澤未降物增數倍之價國無九年之
儲靜思其由誠有所自蓋臣等任過其量力不逮心
上辜當宁之知下負倉生之望決勝寡術不能束五
兵於虎皮出令乖方不能和四時於玉燭延焦勞於
宸極負愧耻於心顏況復日奉天慈動承清問凡於
纖悉咸以咨詢曾不能畫一嘉謀出一奇計慕前哲
沃心之說寬大君旰食之憂匪石之懇空堅挈瓶之

智無取尙敢戀萬錢之厚俸玷三事之近司苟度朝
昏自固恩寵進退以禮縱未忍於置淵鬼神害盈亦
終當於瞰室國章雖緩陰譴是虞况乃多士盈庭異
人間出道侔伊呂者非少才比管樂者寔繁伏望陛
下別選英髦置於輔弼今臣等退居散地用洽至公
豈惟快華夷僊望之心固亦表君臣終始之分人惟
求舊庶獲於保全鼎旣不任免令於傾覆周章自失
殞越靡遑干冒宸嚴期於得請

第二表

臣某等言臣等近者虔述懇誠共陳章奏蓋以燮調
之無狀乞行罷免之明文奉詔旨以丁寧仰天威而
殞越尙怔忡而待罪又僂俛以經旬輿頌益喧沴氣
彌積膏澤未降漸成憊元之災宸極至尊深軫焦勞
之念上無裨於盱食下有負於具瞻猶尸祿於廟堂
亦胡顏於天地臣等

中謝

竊以堯咨四嶽用致時雍

漢免三公以答天譴蓋以任當輔弼職調陰陽苟愆

伏之成災實憂責之攸繫須行大典以肅朝經如臣
等俱是短才謬膺大用在一人注意之地當萬方思
治之秋聖德誕敷無山甫將明之効宸襟虛佇乏傳
說啓沃之言致君之譽蔑聞竊位之譏空積雖勤以
補拙亦勞而無功斗筭之智空殫塵露之微何取爚
火未息豈禪日月之光山木不材終非梁棟之任是
致彝倫尙鬱至化未孚獄訟滋彰盜賊多有水旱作
沴天災流行江吳荐饑京輔艱食王春已半甘雨未